

U ovom broju, između ostalog, čitajte:

- **Očekuje se veća podrška domaćih vlasti na rješavanju pitanja i interesa radnika – profesionalnih vozača u EU**
- **Održana sjednica UO UPFBiH**
- **Poslodavci i u ovoj godini mogu radnicima neoporezivo isplatiti do 300 KM mjesečno**
- **UPFBiH sa ministrom Delićem razgovarali o radno-pravnom zakonodavstvu**
- **VTK BiH, UPFBiH, UPRS, entitetske privredne komore i Konzorcij "Logistika" uputili zahtjev za održavanje hitne tematske sjednice Vijeća ministara BiH**
- **Zvaničan stav Ministarstva rada i socijalne politike FBiH povodom 1. i 2. marta 2026. godine**



Očekuje se veća podrška domaćih vlasti na rješavanju pitanja i interesa radnika – profesionalnih vozača u EU



Predstavnici Udruženja poslodavaca u FBiH i Unije poslodavaca RS-a održali su sastanak sa ambasadorom Delegacije EU u BiH Luigijem Sorecom, a u vezi sa aktuelnom situacijom statusa prevoznika iz BiH na teritoriju EU. Predstavnici dva udruženja poslodavaca upoznali su ambasadora Sorecu i njegove saradnike o sastanku koji je održan u Vanjskotrgovinskoj komori BiH, a kojem su pored predstavnika udruženja, VTK, entitetskih privrednih komora i udruženja prevoznika organiziranih u Konzorcij „Logistika BiH”, s ciljem definiranja jedinstvenog stava i iniciranja hitnih i održivih mjera za rješavanje problema bh. prijevoznika.

Tokom sastanka u Delegaciji EU u BiH, ambasador i predstavnici poslodavaca, svjesni činjenice da se dvije trećine trgovine Bosne i Hercegovine odvija sa zemljama EU, naglasili su važnost ubrzanih integracijskih procesa. Ambasador Soreca naglasio je važnost redovnih susreta i konsultacija koje u BiH imaju predstavnici poslodavaca sa šefom Delegacije EU u BiH i njegovim saradnicima i iskazao poštovanje prema predstavnicima realnog sektora te podržao zagovarački proces privatnog sektora kako bi po konkretnim pitanjima rada prevoznika i vozača na EU tržištu tako i o pitanjima CBAM-a,





pristupanja Jedinostvenom području plaćanja u eurima (SEPA), izbjegavanja uvrštavanja na "Sivu listu" Moneyval-a i drugo. U pogledu problema sa kojima se suočavaju profesionalni vozači iz BiH i regije, ambasador Soreca pokazao je izuzetno razumijevanje za navedene probleme i naglasio da nedavno objavljena Strategija EU za vize pruža osnovu za srednjoročna i dugoročna rješenja, te da se između Europske

komisije, država članica EU i partnera u regiji trenutno vode razgovori o mogućim rješenjima i dodatnim mjerama, uključujući i vize za dugoročni boravak.

Paralelno, ambasador Soreca je naglasio i važnost posvećenosti bh. vlasti ovom, ali i drugim gore spomenutim pitanjima, obavijestio je poslodavce da predstavnici Delegacije EU u BiH nastavljaju dijalog sa bh. vlastima i zainteresiranim stranama za rješavanje ključnih pitanja.



Također je naglašena važnost preuzimanja inicijative od strane institucija vlasti u BiH i uključivanje resornih bh. ministarstva u predmetnu problematiku kako bi kroz nastavak razgovora sa Europskom komisijom i drugim nadležnim tijelima izborili rješavanje određenih pitanja i interesa za specifičnosti Bosne i Hercegovine pri rješavanju statusa i dozvola profesionalnih bh. vozača pri obavljanju njihovih redovnih poslova u zemljama i na prostoru EU.

Zaključeno je da je potrebna sinergija pri rješavanju ovih pitanja te da će EU članice uraditi sve što je u njihovoj mogućnosti da se olakša ovo pitanje, ali sa druge strane, očekuje se da svoj odgovornosti preuzmu institucije Bosne i Hercegovine i riješe pitanja od važnosti za kompanije i građane u BiH.

Održana sjednica Upravnog odbora UPFBiH



Na sjednici Upravnog odbora UPFBiH održanoj 27. februara 2026. godine, članovi su razmatrali materijal UPFBiH za tematsku sjednicu ESV-a vezano za pitanja zdravstvenog osiguranja radnika u FBiH, koja je zakazana za 03.03.2026. godine.

Učesnici sastanka ukazali su da se radi o decenijskoj inicijativi UPFBiH čiji je cilj da se obaveza naknade plaće za vrijeme bolovanja na teret poslodavca smanji sa 42 na 15 dana, kako bi se smanjila zloupotreba instituta bolovanja te da je Prijedlog zakona 2022. godine prošao javnu raspravu, ali ne i parlamentarnu proceduru. Istaknuto je također da u FBiH zloupotreba bolovanja izuzetno velika zbog nepostojanja uređenih sistemskih kontrola te da je zloupotrebe bolovanja jedan od terete poslovanja s kojima se poslodavci sve teže suočavaju.

Udruženje je za sjednicu UO pa tako i za sjednicu ESV-a pripremilo veoma stručne i detaljno obrazložene materijale i prijedloge.

Članovi UO usvojili su materijal i stavove UPFBiH za prijedlog izmjena Zakona o zdravstvenom osiguranju i kontrole bolovanja kroz izmjene i dopune Pravilnika o postupku i kriterijima za utvrđivanje privremene spriječenosti za rad osiguranika. Zaključeno je da će se insistirati na upućivanju u proceduru u što kraćem roku izmjena Zakon i na konačnom rješavanju druge dvije inicijative poslodavaca a koje se odnose na naknadu troškova u slučaju povrede na radu i profesionalne bolesti i pitanje reosiguranja tj. neprevodivosti takve norme u praksi. Također je zaključeno da će se insistirati na usvajanju i stupanju na snagu novog Pravilnika o postupku i kriterijima za utvrđivanje privremene spriječenosti za rad osiguranika u roku od 60 dana od dana održavanja tematske sjednice ESV-a te da će se tražiti od Ministarstva zdravstva FBiH

momentalno uspostavljanje radne grupe koja će pripremiti tekst novog pravilnika.

Na sjednici su članovi razmatrali odluke o održavanju XXIII redovno sjednice Skupštine UPFBiH. Zaključeno je da će se Skupština održati 14.04.2026. godine u Hotelu Hills te je utvrđen dnevni red iste.

Na sjednici se raspravljalo i o problematici vezano za pitanja rada i boravka bh. vozača na prostoru EU pa tako i o blokadi graničnih prelaza od strane Konzorcija "Logistika BiH". Članovi UO upoznati su o svim aktivnostima Udruženja vezano za pitanje rješavanja problema sa kojima se suočavaju međunarodni prevoznici, a koja uključuju i održane sastanke sa predstavnicima Delegacije EU u BiH, Vijeća ministara BiH, Vlade FBiH, VTK BiH, entitetskih privrednih komora, poslodavačkih udruženja, članica UPFBiH, Unije poslodavaca RS i drugima, zajednički zahtjev VTK, UPFBiH, UPRS, privrednih komora i Konzorcija "Logistika BiH" za organizovanje hitne sjednice Vijeća ministara, inicijative UPFBiH i UPRS ambasadama Hrvatske, Njemačke, Italije, Slovenije i Austrije za osiguranje izdavanja dugoročnih viza za profesionalne vozače i brojni drugi sastanci i inicijative.

Upravni odbor podržao je aktivnosti koje je rukovodstvo Udruženja provodilo u prethodnom periodu direktno ili u saradnji sa spomenutim i brojnim drugim partnerima. Zaključeno je da Upravni odbor podržava legitimne zahtjeve prevoznika i da se stavlja u funkciju njihovog rješavanja i saradnje i u tom pravcu usko će sarađivati sa svim akterima u procesu, ali i dalje ne podržava blokade graničnih prelaza jer zbog takve mjere štetu trpe najviše privrednici i ukupno stanovništvo u BiH, što bi u i ovako složenom poslovnom okruženju bila dodatna i veoma opterećujuća okolnost poslovanja. Zbog izuzetne važnosti ovog pitanja, u slučaju ponovljenih inicijativa sa ovako ekstremnim mjerama poput blokada graničnih prelaza, sazvat će se hitna vanredna sjednica UO s ciljem zauzimanja stavova po takvim eventualnim pitanjima, zaključeno je.

Na sjednici se razmatrala i analiza zaključaka sa konsultativnog sastanka poslodavačkih udruženja i komora. Učesnici sastanka ocijenili su da napredak u unapređenju poslovnog okruženja u FBiH još uvijek nije dovoljno stimulativan za razvoj privrede, posebno u oblasti prekograničnog poslovanja. Iako postoje određeni pomaci, i dalje nedostaju ključni strateški okviri i propisi. Otvaranje BiH prema EU i drugim tržištima ograničeno je slabim intervencijama u izvozno-uvoznoj politici, digitalizaciji, energetici, pristupanju SEPA sistemu i drugim mehanizmima važnim za konkurentnost kompanija. Zatražene su ubrzanе reforme, veća uključenost poslovne zajednice i hitno donošenje ključnih politika i propisa. Zaključci sa sastanka dostavljeni su relevantnim institucijama na svim nivoima Bosne i Hercegovine na dalje postupanje. Članovi su primili k znanju informaciju te je data podrška Udruženju za dodatno jačanje saradnje sa partnerima s ciljem zajedničkog djelovanja na unapređenju poslovnog ambijenta.

Poslodavci i u ovoj godini mogu radnicima neoporezivo isplatiti do 300 KM mjesečno



Poslodavci u Federaciji Bosne i Hercegovine će i u narednom razdoblju moći isplatiti neoporezivu naknadu radnicima u visini do 300 KM mjesečno za mjesec od januara do juna 2026. godine.

Ekonomsko-socijalno vijeće za teritoriju Federacije Bosne i Hercegovine 03.02.2026. godine je, na prijedlog dopremijera FBiH i federalnog ministra finansija Tonija Kraljevića, podržalo Uredbu o isplati neoporezive pomoći radnicima u 2026. godini koja će se naći na sljedećoj sjednici Vlade Federacije BiH.

Navedena Uredba dio je niza mjera koje Vlada FBiH već duže vrijeme poduzima s ciljem poboljšanja životnog standarda radnika.

"Cilj navedene mjere, koja je nastala kao produkt kontinuiranog dijaloga sa sindikatima i predstavnicima poslodavaca, je pružanje dodatne finansijske podrške zaposlenima budući da se primjenom iste otvara prostor za rast primanja", kazao je dopremijer Kraljević.

Dodaje kako sukladno ovom propisu poslodavac ne može primijeniti odredbe Uredbe na način da radniku umani plaću koja mu je obračunata i isplaćena za mjesec novembar 2025. godine. Isplata pomoći zaposlenicima se može vršiti mjesečno za mjesec na koji se pomoć odnosi i to (tek po isteku tog mjeseca) u periodu od prvog dana narednog kalendarskog mjeseca, a najkasnije do zadnjeg dana narednog kalendarskog mjeseca.

Poslodavac je dužan, do 7. u mjesecu za protekli mjesec u kojem je izvršena isplata pomoći, dostaviti nadležnoj Poreznoj ispostavi Izvješće o isplati pomoći. Porezna uprava će po prijemu navedenog Izvješća izvršiti kontrolu ispunjenosti uslova za isplatu pomoći propisanih ovom uredbom.



Inače, ponovno donošenje Uredbe o isplati neoporezive pomoći radnicima uz smanjenje zbirne stope doprinosa, nakon gotovo dva desetljeća, kroz izmjene i dopune Zakona o doprinosima FBiH pokazuje opredjeljenje Vlade FBiH za reforme u oblasti rada koje dovode do stvaranje povoljnijeg poslovnog okruženja i otvaranja novih radnih mjesta.

Predsjednik Ekonomsko-socijalnog vijeća Federacije BiH Safudin Čengić izjavio je da je na današnjoj sjednici ESV-a omogućeno predstavnicima Konzorcija Logistika da iznesu probleme s kojima se suočavaju, kako bi se članovi Vijeća s njima upoznali i donijeli zaključci koji bi mogli doprinijeti njihovom rješavanju, ali i unapređenju ukupnih priprema u ovom sektoru.

"Razmatrali smo i Uredbu koja omogućava poslodavcima da radnicima isplate određeni iznos sredstava bez uplate doprinosa. Predstavници sindikata tražili su da taj iznos ostane 400 KM, dok su predstavnici Vlade ukazali na jedinstven stav da se u periodu od 1. januara do 31. jula isplaćuje 300 KM bez plaćanja doprinosa" rekao je Čengić.

Dodao je da su razmatrane i druge tačke dnevnog reda, uključujući izvještaj o radu ESV-a te program rada za narednu godinu, koji su usaglašeni.

"Evidentno je da ćemo morati održavati više sjednica kako bismo pomogli i Vladi i Parlamentu u donošenju zakona koji bi poboljšali ukupnu situaciju" naglasio je Čengić.

Govorio je i o problemu nedostatka radnika, te potvrdio da u Federaciji BiH postoji veliki broj radnika na birou, a kada poslodavac traži običnog administrativnog radnika, ne može da ga nađe.

"Potrebno je da se ovo uredi kroz zakon da se odvoje radnici od neradnika" kazao je Čengić.



Na sjednici je analizirana i realizacija zaključaka sa prethodnog sastanka, pri čemu je ponovo istaknuto pitanje izmjena i dopuna Zakona o zdravstvenom osiguranju. Poslodavci smatraju da je neprihvatljivo da radnik u prosjeku ostaje na bolovanju 40-ak dana, dok se u zemljama Europske unije taj prosjek kreće između šest i sedam dana.

"Ministar je iznio stav da će do kraja ovog mjeseca biti održana tematska sjednica ESV-a, na kojoj će se razmotriti načini smanjenja broja dana bolovanja koji opterećuju poslodavce, bilo da se taj period skрати na 15 dana ili da se rigorozno sankcionišu zloupotrebe" kazao je Čengić.

Zaključeno je i da će sve što je u nadležnosti Vlade biti pokrenuto kako bi se uvele neophodne promjene.

Predsjednik Saveza samostalnih sindikata BiH Samir Kurtović podsjetio je da je prvobitni prijedlog iznosio 250 KM, ali da je usaglašeno da neoporezivi iznos bude 300 KM.

"I ovaj put pozivamo poslodavce da radnicima isplate dodatnih 300 KM na plaću, bez plaćanja poreza i doprinosa. Kao Sindikat očekujemo detaljne izvještaje kako bismo vidjeli da li su poslodavci ovu mjeru ispoštovali" rekao je Kurtović.

Poslodavci sa ministrom Delićem razgovarali o radno-pravnom zakonodavstvu

Delegacija Udruženja poslodavaca u FBiH obavila je konsultacije vezano za radno-pravno zakonodavstvo u FBiH sa ministrom rada i socijalne politike FBiH Adnanom Delićem.

Ministar Delić obavijestio je poslodavce da su u proceduru upućeni Zakon o posredovanju u zapošljavanju i socijalnoj sigurnosti nezaposlenih osoba i Zakon o zapošljavanju stranaca u FBiH. Nakon što su nacrti usvojeni od strane Vlade FBiH, upućeni su u parlamentarnu proceduru, uvršteni na dnevni red Zastupničkog doma, a potom i povučeni sa istog. Zakoni su pripremljeni u uskoj saradnji sa socijalnim partnerima te se očekuje ponovno vraćanje na dnevni red i što skorije razmatranje i usvajanje.

Razgovaralo se i o potrebi izmjena i dopuna Zakona o zaštiti na radu kojom prilikom su poslodavci ukazali da postojeći zakon nije još uvijek osigurao visok sistem zaštite na radu. Više je njegovo dejstvo usmjereno na poštivanje procedura, administriranje i slično, čime se troše

administrativni i finansijski resursi kompanija dok je konkretna zaštita radnika zanemarena.

Tokom sastanka dominirala je tema novog Zakona o radu. Poslodavci su pohvalili napore ministra Delića na pripremi ovog zakona i drugih propisa iz oblasti radno-pravnog zakonodavstva, ali su skrenuli pažnju i naglasili da očekuju uvid u verziju zakona koja je upućena na usvajanje Vladi FBiH kako bi konačan materijal uporedili sa dostavljenim komentarima i prijedlozima UPFBiH.



Posebno su predstavnici poslodavaca ukazali na važnost konačnih rješenja i instituta u Zakonu, a koji se odnose na ugovore o radu, pauzu u toku radnog vremena, usaglašavanje Zakona sa organizacionim i sektorskim specifičnostima, pitanja pravilnika o radu, probnog rada, radnog vremena, disciplinskih postupaka i drugo a naglasak je na potrebi modernizacije i digitalizacije poslovanja u skladu sa potrebama i interesima modernog tržišta rada.

Ministar je obavijestio poslodavce o planiranim narednim koracima te je zaključeno da će socijalni partneri biti u potpunosti uključeni u procese koji predstoje pri usvajanju ovog krovnog zakona koji uređuju radno-pravne odnose u FBiH.

VTK BiH, UPFBiH, UPRS, entitetske privredne komore i Konzorcij "Logistika" uputili zahtjev za održavanje hitne tematske sjednice Vijeća ministara BiH



U prostorijama Vanjskotrgovinske komore BiH 16.02.2026. godine održan je hitan sastanak predstavnika transportnog sektora, privrednih komora, udruženja poslodavaca i bh. kompanija iz različitih sektora privrede. Jedan od zaključaka tog sastanka jeste potreba sazivanja hitne tematske sjednice Vijeća ministara BiH i nadležnih državnih i entitetskih ministarstava. Zahtjev za održavanje hitne tematske sjednice Vijeća ministara BiH dostavljen je 18.02.2026. godine.

Zahtjev pročitajte [OVDJE](#).

Produženje mjere "zaključanih cijena" do potpune implementacije aplikacije za poređenje cijena

Federalni ministar trgovine Amir Hasićević održao je 24.02.2026. godine u sjedištu Vlade Federacije BiH u Sarajevu, sastanak s predstavnicima Udruženja poslodavaca u Federaciji Bosne i Hercegovine iz grupacije trgovine. Iz Federalnog ministarstva trgovine saopćeno je da ja na sastanku razgovarano o statusu zakonskih rješenja iz oblasti trgovine, kao i nastavku realizacije projekta "zaključanih cijena".

"S obzirom na to da Odluka Vlade Federacije BiH o zaključenim cijenama ističe 1. marta, predstavnici trgovaca izrazili su saglasnost da se mjera produži za dodatnih 60 dana, kako bi svi učesnici na tržištu imali dovoljno vremena za dostavu i verifikaciju podataka potrebnih za punu funkcionalnost aplikacije za uspoređivanje cijena" navode iz Ministarstva.



Dodaju da se produženjem ove mjere osigurava kontinuitet zaštite potrošača, ali i nesmetan prelazak na novi model tržišne transparentnosti putem digitalnog alata koji će građanima omogućiti jasan uvid u cijene proizvoda u različitim trgovačkim objektima.

"Na sastanku je istaknuto da Federalno ministarstvo trgovine paralelno nastavlja unapređenje zakonodavnog okvira u oblasti regulacije tržišta. U tom kontekstu, Zakon o iznimnim mjerama kontrole cijena u vanrednim okolnostima bit će upućen u parlamentarnu proceduru, dok će Zakon o zaštiti potrošača biti dostavljen Parlamentu Federacije BiH u formi prvog čitanja" navode iz Ministarstva.

Dodaju da je cilj ovih propisa jačanje institucionalnih mehanizama zaštite potrošača, osiguranje stabilnosti tržišta u vanrednim okolnostima, te dodatno unapređenje transparentnosti i fer tržišne konkurencije u Federaciji Bosne i Hercegovine.

Federalno ministarstvo trgovine i predstavnici sektora trgovine potvrdili su nastavak partnerskog pristupa u kreiranju mjera koje istovremeno štite standard građana i osiguravaju održivo poslovno okruženje, saopćeno je iz ovog ministarstva.

Zvaničan stav Ministarstva rada i socijalne politike FBiH povodom 1. i 2. marta 2026. godine

Udruženje poslodavaca u FBiH obratilo se Ministarstvu rada i socijalne politike FBiH sa zahtjevom za mišljenje o primjeni odredbi Zakona o proglašenju 01. marta Dana nezavisnosti Bosne i Hercegovine, a koji ove godine pada u nedjelju, kao i primjene Zakona o radu, član 76, vezano za odredbe za rad u dane praznika.

Tačnije, tražilo se mišljenja, u situaciji kada državni praznik pada u nedjelju, a odlukom Vlade FBiH prenese se kao neradni na ponedjeljak, u konkretnom slučaju 01. i 02. mart 2026. godine, da li je dopušteno organizovanje rada na navedene dane, pod uslovima i u skladu sa članom 76. Zakona o radu i kolektivnim ugovorom za tu djelatnost ili je riječ o apsolutnoj zabrani rada (osim u izuzetno propisanim djelatnostima)?

Ministarstvo rada i socijalne politike FBiH dostavilo je odgovor u kojem se navodi da je odredbama Zakona o proglašenju 1. marta Danom nezavisnosti Bosne i Hercegovine propisano da se 1. mart proglašava Danom nezavisnosti Bosne i Hercegovine, da je isti državni praznik, te da na Dan nezavisnosti državni organi, preduzeća i druga pravna lica ne rade.

Nadalje, Vlada Federacije Bosne i Hercegovine, je na sjednici održanoj dana 20.02.2026. godine, donijela odluku kojom se ponedjeljak, 2. mart 2026. godine, proglašava neradnim danom, povodom obilježavanja Dana nezavisnosti Bosne i Hercegovine. Prema navedenoj odluci svi državni organi, preduzeća i druga pravna lica na ovaj dan će biti oslobođeni rada.

Odredbom člana 76. Zakona o radu ("Službene novine Federacije BiH", br. 26/16, 89/18, 44/22 i 39/24) propisano je da radnik ima pravo na povećanu plaću za otežane uvjete rada, prekovremeni rad i noćni rad, te za rad na dan sedmičnog odmora, praznika ili nekog drugog dana za koji je zakonom određeno da se ne radi, u skladu sa kolektivnim ugovorom, pravilnikom o radu i ugovorom o radu.

Shodno navedenom, Ministarstvo je mišljenja smo da radnik koji radi na dan praznika ostvaruje pravo na povećanu plaću u iznosu koji je određen kolektivnim ugovorom, pravilnikom o radu ili ugovorom o radu.

Mišljenje pročitajte [OVDJE](#).

Održan sastanak predstavnika Udruženja poslodavaca u FBiH i ABSL-a

Predstavnici Udruženja poslodavaca u Federaciji Bosne i Hercegovine održali su 9. februara 2026. godine sastanak sa predstavnicima organizacije Asocijacija biznis servis lidera (ABSL).

U ime Udruženja sastanku su prisustvovali direktor Mario Nenadić, predsjednik Udruženja poslodavaca Kantona Sarajevo Suad Ećo te sekretarka UPFBiH Mersiha Jusić, dok su ispred ABSL-a prisustvovali članovi UO ABSL-a Jasmin Zulčić i Kemal Babić.



Tokom sastanka razgovaralo se o pitanjima funkcionalno modernih oblika poslovanja u cijelom svijetu, pa tako i u Bosni i Hercegovini, kao što su poslovni servisi u oblasti IT-a, korisničke podrške, finansija i računovodstva, izvoz usluga i servisne djelatnosti uopće.

Sektor poslovnih servisa u Bosni i Hercegovini zapošljava više od 16.000 radnika u više od 150 kompanija, a o značaju i izazovima ove oblasti govori i podatak da na nivou Europe ova industrija zapošljava blizu 40 miliona ljudi.

Predstavnici ABSL-a informisali su predstavnike Udruženja poslodavaca u FBiH o problemima i izazovima s kojima se susreću u poslovanju, te ukazali na potrebu dorade i unapređenja sistema u pojedinim oblastima, posebno u dijelu radno-pravnog zakonodavstva, ali i fiskalne politike, pitanja PDV-a i drugih regulatornih rješenja koja utiču na konkurentnost ovog sektora.

Na sastanku je istaknuta važnost jačanja institucionalne saradnje, razmjene informacija i zajedničkog djelovanja prema nadležnim institucijama, s ciljem stvaranja povoljnijeg i predvidivijeg poslovnog ambijenta za kompanije koje posluju u okviru servisne industrije. Učesnici sastanka usaglasili su naredne korake saradnje, uključujući potpisivanje Memoranduma o saradnji, kao i pokretanje procedure za članstvo ABSL-a u Udruženju poslodavaca u FBiH, s ciljem jačanja zajedničkog zastupanja interesa poslodavaca i daljeg razvoja ovog rastućeg sektora.

Predstavници UPFBiH na konferenciji "Od rizika do otpornosti: Zaštita trgovine i investicija u BiH"



Borba protiv pranja novca i finansiranja terorizma nije samo tehničko pitanje, već ključni proces kojim se direktno štiti domaća privreda i finansijski sistem, jača povjerenje građana i osigurava stabilnost koja je potrebna međunarodnim partnerima koji žele ulagati u Bosnu i Hercegovinu.

Rečeno je to na konferenciji "Od rizika do otpornosti: Zaštita trgovine i investicija u BiH" koju su u Parlamentarnoj skupštini Bosne i Hercegovine 12.02.2026. godine organizirali Ministarstvo sigurnosti Bosne i Hercegovine, u saradnji s International Governance and Risk Institute (GovRisk) i Američkom privrednom komorom u BiH (AmCham).

Događaj je okupio visoke predstavnike institucija vlasti, privatnog sektora i međunarodnih partnera u cilju identifikacije praktičnih i koordiniranih mjera kao odgovora na Moneyvalovu procjenu Bosne i Hercegovine, a istom su prisustvovali i predstavnici Udruženja poslodavaca u FBiH.

Zamjenik ministra sigurnosti Bosne i Hercegovine Ivica Bošnjak izjavio je da je Ministarstvo sigurnosti BiH u proteklom periodu poduzelo čitav niz mjera i radnji u cilju realizacije preporuka iz izvještaja MONEYVAL-a.

Istakao je da je na prijedlog Ministarstva formirano koordinacijsko tijelo koje usklađuje



aktivnosti na državnoj, entitetskoj i nižim razinama vlasti te da je uspostavljeno deset pododбора, od kojih četiri već aktivno djeluju na sprečavanju pranja novca, financiranju terorističkih aktivnosti i financiranju oružja za masovno uništenje.

Istako je da je Koordinacijsko tijelo, u kojem sudjeluju predstavnici svih nadležnih institucija, usaglasilo konačni tekst zakona o sprečavanju ciljanim transakcijama, odnosno zakona o mjerama ograničavanja raspolaganja imovinom u cilju sprečavanja terorizma, finansiranja terorizma i finansiranja oružja za masovno uništenje.

Kao je naveo, zakon je trenutno u fazi pripreme za prikupljanje saglasnosti Ureda za zakonodavstvo i Ministarstva finansija te se nalazi na e-konsultacijama. Bošnjak je izrazio očekivanje da će se već krajem ovog mjeseca ili na jednoj od narednih sjednica zakon naći pred Vijećem ministara i ući u parlamentarnu proceduru.

Naglasio je da samo donošenje zakona i podzakonskih akata nije dovoljno te da je ključna i njihova realizacija i nadzor nad provedbom. Današnja konferencija, istakao je, pokazatelj je važnosti zajedničkog djelovanja, posebno uz sudjelovanje privatnog sektora koji će biti značajno uključen u primjenu preporuka.

Bošnjak je upozorio da bi stavljanje Bosne i Hercegovine na tzv. "sivu listu" imalo ozbiljne posljedice za provredu, investicije, kreditni rejting te sve građane zemlje.

Šef Delegacije Europske unije u Bosni i Hercegovini Luigi Soreca izjavio je da borba protiv pranja novca predstavlja direktan interes Bosne i Hercegovine, jer je ključna za stabilnost i dugoročni ekonomski razvoj zemlje.

Istaknuo je da se BiH trenutno nalazi na važnoj prekretnici. U veoma skorom roku međunarodne institucije relevantne za ovu oblast iznijet će ocjenu o dosadašnjem napretku BiH, i to već u narednim sedmicama.

"Dosta je obećanja dato, ali isto tako mnogo posla je ostalo da se uradi, i to u vrlo kratkom roku" rekao je Soreca, pozivajući vlasti na svim nivoima u BiH i entitetima da ulože maksimalne napore kako zemlja ne bi ponovo završila na takozvanoj sivoj listi.

Soreca je podsjetio da će konferencija biti prilika da se evociraju negativne posljedice perioda



od 2018. do 2022. godine, kada se BiH nalazila na sivoj listi, uključujući direktne štete za privredu, a time i za građane.

Naglasio je da Europska unija ostaje čvrsto opredijeljena za podršku Bosni i Hercegovini, posebno kao zemlji kandidatu za članstvo. EU, kako je rekao, pruža ne samo tehničku već i političku i finansijsku podršku. Kao primjer naveo je Plan rasta, u okviru kojeg je predviđeno 15 miliona eura pomoći BiH upravo u oblasti borbe protiv pranja novca i finansiranja terorizma.

Rezidentni predstavnik UNDP-a u Bosni i Hercegovini Renaud Meyer izjavio je da je održavanje konferencije izuzetno važno, ali i blagovremeno, zbog rizika da BiH ponovo bude uvrštena na sivu listu, što bi, kako je naglasio, neminovno imalo posljedice na ukupni razvoj zemlje.

Meyer je istaknuo da UNDP učestvuje u ovoj raspravi, dodajući da angažman organizacije ide mnogo šire od samog učešća u diskusijama i obuhvata konkretne aktivnosti u oblastima borbe protiv pranja novca, sprečavanja nezakonitih tokova novca i borbe protiv korupcije.

Ocijenio je da su sve te oblasti direktna prijetnja razvoju Bosne i Hercegovine. Podsjetio je da novac koji ostaje zarobljen u nezakonitim tokovima ne odlazi tamo gdje je najpotrebniji — u sektore obrazovanja, zdravstva i socijalne zaštite.

Meyer je naglasio da je potrebno uspostaviti odgovarajuće mehanizme i tehnička rješenja kako bi se unaprijedilo stanje u ovim oblastima te da je sada pravi trenutak za djelovanje, jer su već definisana adekvatna tehnička rješenja i aranžmani.

"Volja i odluka su u rukama domaćih aktera" poručio je Meyer, izrazivši nadu da će neophodne političke odluke biti donesene u što skorijem roku kako bi se osigurao adekvatan razvoj države.

Izvršni direktor organizacije GovRisk Dominic Le Moignan izjavio je da je povod ovog okupljanja činjenica da finansijski integritet sam po sebi predstavlja temelj ekonomijske sigurnosti svake države, uključujući Bosnu i Hercegovinu.

Le Moignan je naglasio da ishod aktuelnog procesa ima izuzetnu važnost za privredu, građane i ukupni kredibilitet Bosne i Hercegovine. Cilj konferencije je, dodao je, da se brzo pređe iz strateškog okvira u raspravu o stvarnim, opipljivim efektima i posljedicama koje finansijski

integritet ima u praksi.

Direktor BH Telecoma Amel Kovačević upozorio je da će Bosna i Hercegovina, ukoliko ne usvoji potrebne zakone, izgubiti finansijski rejting, što bi dovelo do skupljih kredita i većih troškova za građane i privredu. Dodao je da pojedine političke strukture koče donošenje zakona, zbog čega zemlja rizikuje dublje ekonomsko siromašenje.

MONEYVAL, mehanizam Vijeća Europe, provodi evaluaciju nacionalnih sistema za sprečavanje pranja novca i finansiranja terorizma. Odluka o tome hoće li Bosna i Hercegovina biti stavljena na sivu listu FATF-a očekuje se na plenarnoj sjednici FATF-a u junu 2026. godine.

Stavljanje države na sivu listu FATF-a signalizira postojanje strateških nedostataka u sistemu za sprečavanje pranja novca i finansiranja terorizma. Iako takva odluka ne podrazumijeva direktne sankcije, ona često dovodi do pojačanog nadzora međunarodnih banaka i investitora, usporavanja prekograničnih transakcija, povećanja troškova usklađenosti te negativnog utjecaja na priliv stranih investicija.

Sastanak sa predstavnikom kompanije NEXGen BPO



Direktor UPFBiH Mario Nenadić održao je sastanak sa predstavnikom kompanije NEXGen BPO Arijanom Ilićem. Direktor Nenadić upoznao je Ilića o ključnim aktivnostima UPFBiH, status Udruženja i programskim aktivnostima

za naredni period. Obzirom da je kompanija NEXGen BPO jedna od kompanija iz oblasti industrije usluga, direktor je prezentirao strukturu Udruženja, način organizacije, članstvo, uspostavljene i funkcionalne grane poslovanja te ostavio mogućnost kompanijama iz oblasti ove industrije da se u okviru Udruženja organiziraju u posebnu granu i time štite interese te grane u FBiH. Industrija usluga, kako se ova grana kolokvijalno naziva, danas u FBiH je jedna od rastućih grana poslovanja i zapošljavanja u oblasti call centara, digitalnih platformi i drugih modernih usluga poslovanja na širem svjetskom tržištu.

Direktor UPFBiH prisustvovao Skupštini Udruženja malih i srednjih privrednika



Direktor Udruženja poslodavaca u Federaciji Bosne i Hercegovine Mario Nenadić prisustvovao je drugoj redovnoj Skupštini Udruženja malih i srednjih privrednika. Skupštinu je otvorio predsjednik Skupštine Kenan Agić koji je u uvodnom obraćanju istakao značaj jedinstva realnog sektora i potrebe da se glas privrednika organizovano i kontinuirano zastupa kroz institucionalne kanale.

Skupština je usvojila sve tačke dnevnog reda, odnosno izvještaje o radu, finansijsku dokumentaciju i planove za naredni period, a koje je prezentovao predsjednik Udruženja Benjamin Hekić.

Na Skupštini u uvodnom dijelu se obratio i direktor UPFBiH Mario Nenadić koji je naglasio važnost što boljeg organiziranja privrednih subjekata i u ime Udruženja naglasio spremnost na podršku Udruženju malih i srednjih privrednika i saradnju te iznio analizu ključnih izazova za privredu u tekućoj godini.

Predstavljena je i UMSP Biz App, nova digitalna platforma namijenjena povezivanju članova i razmjeni poslovnih ponuda.

Kompanija dm započela obilježavanje 20 godina poslovanja u BiH - 700 zvanica i predstavljanje kampanje "Žar za budućnost"



Svečanim događajem u prisustvu gotovo 700 zvanica, kompanija dm drogerie markt započela je obilježavanje 20 godina uspješnog poslovanja u Bosni i Hercegovini. Proslava jubileja – dvije decenije rasta i razvoja na bh. tržištu – okupila je zaposlenike, poslovne partnere, predstavnike medija te goste iz zemlje, regije i dm grupe, a svečanosti je prisustvovala i sekretarka UPFBiH Mersiha Jusić.

Večer je bila posvećena ljudima, onima koji su otvorili prvu dm trgovinu u sarajevskom naselju Dobrinja, kao i svima koji su tokom godina doprinijeli rastu kompanije u najveći drogerijski lanac u Bosni i Hercegovini te pozicioniranju dm-a kao najpoželjnijeg poslodavaca dugi niz godina. Danas dm posluje kroz 93 trgovine u 48 gradova i zapošljava više od 1.200 zaposlenika, kontinuirano šireći svoju ponudu i unapređujući usluge poput online shopa i Moj dm aplikacije. Kroz asortiman sa više od 14.000 proizvoda iz oblasti ljepote, zdravlja, njege, dječijeg asortimana, zdrave ishrane i domaćinstva, dm svakodnevno odgovara na potrebe kupaca, nudeći kvalitetne proizvode po uvijekpovoljno cijenama.

Domaćin večeri, direktor dm BiH Damir Šlosel, obraćajući se prisutnima naglasio je da je princip "čovjek na prvom mjestu" temelj poslovanja kompanije od prvog dana.

"Već 20 godina na tržištu Bosne i Hercegovine naš je cilj u središte djelovanja staviti potrebe

pojedinka – bio on naš zaposlenik, kupac, poslovni partner ili dio zajednice u kojoj poslujemo. I u godinama koje su pred nama težimo istom: razvijati se u skladu s potrebama kupaca, nudeći poseban doživljaj kupovine u kojem se osjećaju dobrodošlo i shvaćeno", istakao je Šlošel.

Da filozofija "Tu sam čovjek" predstavlja stvarnu praksu, potvrdila je i Admira Isaković, članica Poslovodstva dmBiH, podijelivši lično iskustvo iz prvih mjeseci rada u kompaniji.

"Nakon četiri mjeseca rada shvatila sam da sam trudna i u panici nazvala tadašnju voditeljicu. Prvo što mi je rekla bilo je: 'Za ugovor ne brini, stavit ćemo ga na neodređeno'. Tada sam shvatila da dm nije samo posao. Hvala dm-u što mi je dao osjećaj da sam čovjek – i to baš svaki dan" kazala je Isaković.

Tokom večeri prisutnima su se, između ostalih, obratili i članovi Poslovodstva dmBiH Alma Aščić-Efendić, Emina Mušinović, Kristina Ćosić i Seid Jašarević, kao i predstavnici regionalnog menadžmenta Gordana Picek, članica Uprave dmHR i voditeljica regije Adria za Nabavu i Marketing, te direktor dmHR Mirko Mrakužić. Njihova obraćanja podsjetila su na razvojni put kompanije, profesionalne prilike koje dm pruža zaposlenicima i važnost regionalne saradnje.

Jubilarni događaj ozvaničio je i početak cjelogodišnje kampanje "Žar za budućnost", koja će biti realizovana u 12 dm zemalja. Kampanja ima za cilj dodatno osnažiti društveni angažman građana i podržati projekte koji doprinose razvoju zajednice i zaštiti okoliša.

Nova članica UPFBiH - NexGen BPO d.o.o.



NexGen BPO je brzorastuća firma za outsourcing poslovnih procesa koja pruža podršku kompanijama za kamionski i logistički prevoz sa sjedištem u SAD-u. Iz kancelarije u Sarajevu pružaju ključne administrativne usluge, uključujući opremu, reklamacije, regrutaciju vozača i podršku korisnicima.

Nova članica UPFBiH - Udruženje turističkih vodiča Sarajeva "Vučko"



Velika ekspanzija dolazaka u Sarajevo dešava se poslije 2010. godine i turistički vodiči kao i ostali turistički radnici susreću se sa većim i većim izazovima. Turistička djelatnost u Bosni i Hercegovini nije bila uređena te vlast jednostavno nije pratila razvoj i povećanje dolazaka.


Turistički vodiči grada Sarajeva su uvidjeli da staro udruženje nije spremno da se odupre ovim izazovima i shodno tome na sastanku 2018. godine osniva se novo Udruženje turističkih vodiča grada Sarajeva "Vučko" sa jasno određenim ciljevima i strategijama.

Turistički vodiči Udruženja turističkih vodiča "Vučko" Grada Sarajeva svojim dragim posjetiteljima i turistima nude sljedeće usluge:

- Razgled grada Sarajeva u trajanju od jednog do tri sata
- Razgled muzejskih i sakralnih znamenitosti
- Specifične i klijentima prilagođene tematske ture
- Razgled zaštićenih pejzaža Kantona Sarajevo (Vrelo Bosne, Bijambarskih pećina, vodopada skakavac te planine Trebević)
- Višednevne ture po Bosni i Hercegovini

Više o Udruženju pročitajte [OVDJE](#).

Informacija o realizaciji programa zapošljavanja, samozapošljavanja i obuka iz 2025. godine



Federalni zavod za zapošljavanje dostavio je Udruženju poslodavaca u FBiH informaciju o realizaciji programa zapošljavanja, samozapošljavanja i obuka iz 2025. godine. Istoj možete pristupiti [OVDJE](#).



UDRUŽENJE POSLODAVACA

UDRUŽENJE POSLODAVACA U FBiH
MARŠALA TITA 6, 71 000 SARAJEVO

TEL: 00 387 33 552 460

FAX: 00 387 33 552 461

MAIL: info@upfbih.ba

WEB: www.upfbih.ba